



## Cùcuru Nuraxi

Cùcuru Nuraxi est su nòmni de su coddu chi si pesat a manera cònica in su pranu de su Campidanu de Bàsciu, e in su cùcuru in su passau ddoi fiat unu nuraxi mannu meda de genia complessa, chi a dì de oi est gei gei totu sciusciau.

Finsas de is primus stùdius, chi funt de su 1867 (po parti de su Canònicu Spano), fiant arrennèscius a cumprèndi cummenti depiat èssiri sa struttura de su nuraxi. Ma est stètiu cun is primus forrògonus archeològicus, a su cumintzu de su 1960, chi iant cumprèndiu mellus cummenti fiat su complessu monumentali. Su fràigu, pesau cun perdas mannas de arenàrgiu e puddinga, fiat formau de duas turrìs megalìticas, allongiadas cun unu pedigoni. Intrendi, ddoi fiant assumancu tres aposentus, e de custus unu fiat s'aposentu mannu.

A giru a giru de su nuraxi ddoi fiat una biddixedda. In totu cussu logu ant agatau arrestus meda de civilidadi nuraxesa, ma cussu chi aturat sa cosa prus de importu est su putzu sacru stravanau. Fraigau cun perdas de arenàrgiu pìticas e mesanas, su putzu fiat seguru unu fràigu de impreu religiosu-culturali. De sa scala, fata de 17 scaleris strintus e sderrutus, si intrat in s'aposentu acutzau, artu m. 5,30 cun diàmetru basali de m. 2,50.

Asuta, ndi calat su putzu po m. 22 de fundu e cun largària mesana de m. 1,50 chi si impìticat a profilu parabolìcu a m. 1,02.

In s'intrada sua, su putzu est ingiriau de una corona, scurpia cun una sàguma a grunissa.

A faci de su putzu sacru si podit biri unu putziteddu votivu de m. 3 de fundu, ammantau de fileras de perdixeddas, agatau prenu de arrogus de ceràmicas mesu-nuraxesas, de cinixu e de arrestus de mandiari.